

四庫全書

子部

欽定四庫全書

子部

冊府元龜卷八百四十五

詳校官中書臣孫球

侍讀臣孫球覆勘

總校官庶吉士臣何思鈞

校對官中書臣楊世縉

謄錄監生臣周元梓

欽定四庫全書

冊府元龜卷八百四十四

宋 王欽若等 撰

總錄部

守官

勤幹

傳曰守道不如守官又曰見死不更其守蓋夫委質公朝從政王室靖恭兩位職思其憂故有專秉彝章恪居官次引招靡應李清是從聞變難而不移彊臣以之屈

意奉憲令而無撓明主繇是改觀得守器之規絕代庖之咎宜乎寵以異數謂之能臣者哉

欒鍼晉中軍帥欒晝子也晉侯及楚子鄭伯戰于鄢陵

有淖於前

淖泥

乃皆左右相違於淖

違辟

步毅御晉厲

公欒鍼為右

步毅即
郤毅

欒范以其族夾公行

二族強故
在公左右

陷

于淖欒晝將載晉侯鍼曰晝退國有大任焉得專之

在君

前故子名其父大任謂元帥之職

且侵官冒也

載公為
侵官

失官慢也

去將而御

失官離局姦也

遠其部曲

有三罪焉不可犯也乃扶公

也

以出於淖

謝息魯孟僖子家臣孟孫從昭公如楚晉人來治杞田

季孫將以成與之成孟氏邑本杞田 謝息為孟孫守不可曰人

有言曰雖有挈瓶之智守不假器禮也知人不以夫子謂孟

知人不以夫子謂孟 借人夫子從君而守臣喪邑夫子謂孟 僖子也

雖吾子亦有

猜焉言季孫亦將疑我不忠

齊虞人

史失姓名

景公于沛

沛澤名

招虞人以弓不進公使

執之辭曰昔我先君之田也旌以招大夫弓以招士皮

冠以招虞人臣不見皮冠故不敢進乃舍之仲尼曰守道不如守官

君招當往道之常也
非物不進官之制也

君子韙之韙是也

孔子嘗為委吏矣會計當而已矣為乘田矣牛羊茁壯

長而已矣

孔子嘗為貧而祿仕委吏主委積庾倉之吏也不失會計直當其多少而已乘田苑圃之

吏也主六畜之芻牧也牛羊茁壯肥好食令長大而已
苗長貌也詩云彼苗者葭位卑不得高言頌朝事故但稱職而已

漢胡建字子孟孝武天漢中守軍正丞

南北軍各有正又置丞而建未

得真官兼守之貧無車馬嘗步與走卒起居所以慰薦走卒甚

得其心慰者自上安下者也薦者舉籍也時監軍御史為姦穿北軍壘

垣以為賣區

坐賣曰賣為賣物之區也區者小室之名若今小巷屋之類耳故行士之屋謂之區

廬宿衛宮外士稱為區士也

建欲誅之乃約其走卒

約束也

曰我欲與

公有所誅吾言取之則取斬之則斬於是當選士馬日

監軍御史與護軍諸校列坐堂皇上

校者諸軍之部校也室無四壁曰皇

建從走卒趨至堂皇下拜謁因上堂走卒皆上建指監

軍御史曰取彼走卒前曳下堂皇建曰斬之遂斬御史

護軍諸校皆愕警不知所以建亦已有成奏在其懷中

遂上奏曰臣聞軍法立武以威衆誅惡以禁邪今監軍御史公穿軍垣以求賈利公謂顯然為之私買賣以與士市不

立剛毅之心勇猛之節亡以帥先士大夫尤失理不公

用文吏議不至重法黃帝李法曰獄官名也天文志左角李右角將兵書之

法也李者法官之號也總主征伐刑戮之事也故稱其書曰李法

壁壘已定穿窬不繇

路是謂姦人姦人者殺竊小臣謹案軍法曰正亡屬將

軍將軍有罪已聞言軍正不屬將軍將軍有罪過得表奏之二千石以下行

法焉二千石謂軍中校尉都尉之屬丞於用法疑史於法有疑執事

不諉上

諉累也言執事者當見法即行不可以事累於上也

臣謹以斬昧死以聞

制曰司馬法曰國容不入軍軍容不入國何文吏也

司馬

法亦兵書之名也解在主父偃傳謂詔言在今軍中何用文吏議也

三王或誓於軍中欲

民先成其慮也或誓於軍門之外欲民先意以待事也

慮謂計念也先意謂先為之意也

或將交刃而誓致民志也

欲致民勇敢使不奔志

北建又何疑焉建繇是顯名

符璽郎

史失姓名

昭帝時殿中嘗有怪一夜羣臣相驚霍光

召尚符璽郎

恐有變難故欲收取璽

郎不肯授光光欲奪之郎按

劔曰臣頭可得璽不可得也光甚義之明日詔增此郎秩二等衆庶莫不多光

後漢祭遵從光武征河北為軍市令舍中兒犯法遵於殺之光武怒命收遵時主簿陳副諫曰明公嘗欲衆軍整齊今遵奉法不避是教令所行也光武乃貰之以為刺姦將軍謂諸將曰當避祭遵吾舍中兒犯法尚殺之必不私諸卿也

侯霸為淮平大尹政理有能名及王莽之敗霸保固守

卒全一部

郅惲字君章為上東城門候光武嘗獵車駕夜還惲拒
闕不開帝令從者見面於門間惲曰火明燎遠不受詔
帝乃迴從東中門入東面中門也

何湯為開陽門候建武十八年夏旱公卿皆暴露請雨
雒陽令著車蓋出門湯將衛士鉤令車收案有詔免令
官拜湯虎賁中郎將光武嘗歎曰赳赳武夫公侯千城
何湯之謂帝又微行夜還湯閉門不納更從中東門入

明旦召詣大官賜食諸門候皆奪俸

第五倫為京兆尹閻興主簿時長安鑄錢多姦巧乃署倫為督鑄錢掾領長安市倫平銓衡正斗斛市無阿枉百姓悅服

晉徐脩為羊祜軍司馬祜在荊州頗以畋獵廢政嘗欲夜出脩執戟當營門曰將軍都督萬里安可輕脫將軍安危亦國家之安危也脩今日若死此門乃閉耳祜改容謝之此後稀出矣

後趙王假為永昌門候石勒嘗夜微行簡察營衛齋繒帛金銀以貽門者求出永昌門假欲收捕之從者至乃止旦召假以為振忠都尉爵關內侯

後秦王滿聰為城門校尉姚興從朝門游於文武苑及昏而還將自平朔門入前驅既至滿聰被甲持杖閉門拒之曰今已昏闇奸良不辨有死而已門不可開興乃迴從朝門而入旦而召滿聰進位二等

宋謝莊為侍中領前軍將軍武帝出行夜還勒開門莊

居守以察信或虛報不奉旨須墨詔乃開上後因酒讌從容曰卿欲效郅君章耶對曰臣聞蒐巡有度郊祀有節盤於遊畋著之前誠陛下今蒙犯塵露晨往宵歸容有不逞之徒妄生矯詐臣是以伏須神筆乃敢開門耳南齊荀伯玉為太祖冠軍參軍隨太祖還都除奉朝請令伯玉看宅知家事孝武罷廣興還立別宅遣人於大宅掘樹數株伯玉不與馳以聞太祖曰卿執之是也

傅寂之年十七為州西曹兼直主簿刺史王或行夜還

前驅已至寂之不肯開門曰不奉墨旨或乃於車中為
放然後開或歎曰不意郅君章近在閭下即轉為主簿
北齊張耀為尚書右丞文宣曾因近出令耀居守嘗夜
還耀不時開門勒兵嚴備帝駐蹕門外久之催迫甚急
耀以夜深真偽難辨須火至面識門乃可開於是獨出
見帝笑曰卿欲學郅君章也乃使耀前開門然後入深
嗟賞之賜與錦采

唐褚遂良為諫議大夫兼知起居事太宗嘗問曰卿知

起居記錄何事大抵人君得觀之否遂良對曰今之起居即左右史古左右史書人君言事且記善惡以為鑒誠庶幾人主不為非法不聞帝王躬自觀史太宗曰朕有不善卿必記之邪遂良曰守道不如守官臣職當載筆君舉必記太宗以為然

王播為侍御史德宗貞元末李實為京兆尹恩寵莫二播嘗遇之通途故事臺府相臨實宜下道避至是實不肯避呵道如故播嘗自臺移牒實怒遂奏播為三原令

勤幹

傳曰能業其官詩云不懈於位蓋夫明幹勵職受任居方有統理之才資精練之用雖復繁於簿領靡厭於官曹政經是勤吏事攸攝幹蠱之謂茲以足稱在公之心於焉是取斯所謂思不出位職思其憂智效一官守不假器敏以為政行之惟艱者也故以明濟著聞僕勉從事或終日以斂膝或申旦而不寢衆務具舉彊力斯在茲故為吏者克勵其所守者矣若乃徼當官之譽取辨

職之稱雖日無近名蓋亦不信矣

冥為夏司空勤其官事死於水中殷人郊之

孔子為魯季氏史料糧平嘗為司職吏而畜蕃息

趙奢者趙之田部吏也收租稅而平原君家不肯出趙奢以法治之殺平原君用事者九人

漢蕭何沛人也以文無害為沛主吏掾害傷也無能傷害之也

秦御史監郡者與從事辨之何與共事備辦明何素有方略何乃給泗

水卒吏事第一課最上秦御史欲入言徵何何固請得母

行

尹翁歸為平陽市吏是時大將軍霍光秉政諸霍在平
陽奴客持刀兵入市鬪變吏不能禁變亂也及翁歸為市
吏莫敢犯者

張安世字子孺少以父任為郎用善書給事尚書於尚書中
給事中精力於職休沐未嘗出
給供也

後漢劉虞東海恭王之後也遭世衰亂又與時主疏遠
仕縣為戶曹吏以能治身奉職召為郡吏

虞延陳留東昏人也光武東之雒過小黃高帝母昭靈
后園陵在焉時延為部督郵詔呼引見問園陵之事延
進止從容占拜可觀其陵樹株葉皆請其數俎豆犧牲
頗曉其禮帝善之

蓋延初厯郡列豫州從事所在職辨

陳寵辟司徒鮑昱府豫屬專尚交遊以不肯親事為高
寵嘗非之獨勤以物務

魏薛悌字孝威太祖定冀州以悌及東平王國為左右

長史後至中領軍並悉忠貞練事為世吏表

高柔為刺姦令史柔既處法平允又夙夜匪懈至擁膝抱文書而寢太祖嘗夜微出觀察諸吏見柔哀之徐解裘覆柔身而去自是辟焉

李勝為滎陽太守河南尹勝前後所為宰守未嘗不稱職

陳本歷位郡守九卿所在操綱領舉大體能使羣下自盡有統御之才不親小事不讀法律而得廷尉之稱優

於司馬岐等精練文理

蜀李福為江州督揚威將軍入為尚書僕射福為人精識果銳敏於從政

王離字伯元以幹才顯為督軍從事推法平當代王祗為犍為太守

李嚴字方正南陽人也少為郡職吏以才幹稱荊州牧劉表使厯諸郡縣

吳呂岱守吳丞時大帝領會稽太守親斷諸縣倉庫及

囚繫長丞皆見岱處法應問甚稱帝意召署錄事
滕肖當諸葛恪征淮南以肖為都督掌統留事肖白日
接賓客夜省文書或至曉不寐

晉謝晦為豫州治中從事義熙八年土斷僑流郡縣使
晦分判揚豫民戶以平允見稱

陶侃為荊州刺史侃性聰敏勤於吏職恭而進禮愛好
人倫終日斂膝危坐閭外多事千緒萬端罔有遺漏
陳頤字延思仕為郡督郵簡獲隱匿者三千人為一州

尤最太守劉亨拔為主簿

宋沈叔任少有幹質初為揚州主簿高祖太尉參軍吳山陰令治皆有聲

南齊呂安國廣陵人也宋大明末安國以將領見任隱重有幹局為劉勔所稱

梁宋史仕宋為郢州治中有稱名職

劉坦齊建元初為南郡王國常侍尋補孱陵令遷南中郎錄事參軍所居以幹濟稱

徐勉為侍中時王師北伐候驛填委勉參掌軍書劬勞夙夜動經數旬乃一還宅每還羣犬驚吠勉歎曰吾憂國忘家至於是若吾亡後亦是傳中一事

後梁沈君公吳興人有幹局美風儀文章典正特為明帝所重歷中書黃門侍郎御史中丞傅俊少博學有才幹歷山陰吳建康令並有能名

陳華皎為吳興都尉錄軍府文帝為太守穀帛多以委之皎聰慧勤於簿領

殷不佞少立名節好讀書尤長更術仕梁起家為尚書
兵郎甚有能幹

後魏崔休為司徒右長史聰明強濟善斷決政府多事
辭訟盈几剖判若流殊無凝滯加之公平清潔甚得時
譽

鄭懿涉厯經史善當世事閑雅有治才為孝文所器遇
拜長史兼給事黃門侍郎司徒左長史

曹世表字景昇京兆王征以為從事中郎攝中外兵事

自當煩劇論者皆稱其能

崔玄伯少有才雋號為冀州神童苻融牧冀州為冀州從事管征東記室出總庶事入為賓友衆務修理處斷無滯苻堅聞而奇之

高謐字安平有文武才度以功臣子召入禁中除中散專典祕閣肅勤不倦太武深重之

李冲位至尚書僕射機敏有巧思北京明堂圜丘太廟及雒都初基安處郊祧新起園寢皆資於冲勤志彊力

孜孜無怠且理文簿兼營匠制几案盈積削劂在手初不勞厭也

穆弼為中書舍人轉司州治中別駕厯任有稱又為北鎮都將軍徵拜殿中尚書出鎮涼州所在著稱

封興之為瀛冀二州北平府長史所歷有當官之譽

陸恭之字季順有操尚累遷鎮南將軍所歷並有聲績
平嘗為著作郎遷祕書丞時高允為監河間邢祐北平
陽嘏河東裴宗廣平程駿金城趙元順等為著作佐郎

雖才學互有短長然俱為稱職並號長者允每稱博通
經籍無過嘗也

李獎為散騎常侍鎮東將軍河南尹獎前後所歷皆以
明濟著稱

劉憚歷徐州別駕兗州左軍府長史司空諮議參軍屢
為行臺出使所歷皆有當官之稱

崔敬邕性長者有幹用自司徒主簿轉尚書都官郎中
所在稱職

房景為步兵校尉領尚書郎齊州中正所歷皆有當官之稱

叔孫隣少聰慧知名稍遷北部尚書有當官之稱
郭祚轉中書侍郎遷尚書左丞長兼給事黃門侍郎清勤在公夙夜匪懈孝文甚知賞之

穆觀為左衛將軍管門下中書出納詔命及訪舊事未嘗有所遺漏孝文奇之

許惇字季良清識敏速達於從政位司徒主簿以明斷

見知時人號為入鐵主簿

北齊司馬子如為吏部郎中舉清勤平約遷司徒左長史兼廷尉卿以平直稱及領御史中丞正色舉察為朝廷所許

李璵字道璠隴西成紀人涼武昭王嵩之五世孫父韶並有重名於魏代璵有識量釋褐太尉行參軍累遷司徒右長史及遷都於鄴留璵於後監掌府藏及撤運宮廟材木以明幹見稱累遷驃騎大將軍東徐州刺史

白建字彥舉太原陽邑人也初入為大丞相府騎兵曹
典執文帳明解書計為同局所推

封詢閱涉經史清素自持歷官皆有幹局才具治郡甚
著聲績民吏敬而愛之

叱列長文為涇州長史雖無他伎能在官以清幹著稱
張耀累遷秘書監耀歷事累世奉職恪勤咸見親待未
嘗有過

後周寇雋仕後魏為司空府功曹參軍轉主簿時靈太

后臨朝減食祿官十分之一造永寧佛寺令雋典之資
費巨萬主吏不能欺隱寺成又極壯麗太后嘉之除左
軍將軍

裴俠為工部中大夫俠嘗遇疾沈頓士友憂之忽聞五
鼓便即驚起顧左右可向府耶所苦因此而瘳晉公護
聞之曰裴俠危篤若此而不廢憂公因聞鼓聲疾病遂
愈此豈非天祐其勤恪者也

裴祥俠之子也性忠謹有理劇才少為成都令清不及

俠斷決過之

薛善為汾陰令善幹用彊明一郡稱最太守王罷美之
令善兼督六縣事畢為行臺郎中時欲廣置屯田以供
軍費乃除司農少卿領同州夏陽縣二十七監又於長
陽諸屯置鐵冶復令善為監每月役八千人營造軍器
善自督課兼加慰撫甲兵精利而皆忘其苦焉

高賓累遷計部中大夫賓敏於從政果敢能斷決案牘
雖繁綽有餘裕

李彥累遷開府儀同三司素多疾而勤於蒞職雖沈頓枕席猶理務不輟遂至於卒

申徽初為西魏右僕射賜姓宇文氏徽性勤至凡所居官案牘無大小皆親自省覽以是事無稽滯吏不得為姦後雖歷公卿此志不懈

楊敷為司本中大夫軍器副監敷明習吏事所在以勤察著名每歲奏課居最累獲優賞

裴果魏孝閔時歷眉復二州刺史果性嚴猛能斷決抑

挫豪右理屈滯牧數州號為稱職

馮遷少修謹有幹能辟從事魏神龜中刺史楊均引為
中兵參軍事轉定襄令尋為并州水曹參軍所歷之職
咸以勤恪著稱

柳帶韋為開府儀同三司凡居劇職十有餘年處斷無
滯官曹清肅

梁昕溫裕有幹能歷官內外咸著聲稱

隋杜臺卿兄慈學業不如臺卿而幹局過之仕至開州

刺史

趙綽河東人也性質直剛毅在周為天官府史以恭謹恪勤擢授夏官府下士稍以明幹見知

李圓通京兆涇陽人也高祖為隋國公擢授參軍事高祖初少時每讌賓客嘗令圓通監厨性嚴整左右婢僕咸所敬憚惟世子乳母恃寵輕之賓客未供每有干請圓通不許或輒持去圓通大怒叱厨人撾之數十呌呼之聲徹於閣內僚吏左右相顧失色賓去之後高祖具

知之召圓通命坐賜食從此獨善之以為堪當大任高祖作相賜封懷昌男

張虔雄少有才器秦孝王俊為秦州總管選為法曹參軍王嘗親按囚徒虔雄不持狀口對百餘人皆盡事情同輩莫不歎服

元文都性鯁直明辨有器幹仕周為右侍上士

劉炫河間人也少以聰敏見稱刺史李繪署禮曹從事以吏幹知名

賀婁子幹字萬壽少驍武知名釋褐司水上士稱為彊濟

楊汪為尚書司勲兵部二曹侍郎秦州總管長史名為明幹

周羅睺為幽州刺史俄轉涇州刺史母憂去職未期復起授幽州刺史並有能名

劉子翼為大理正甚有當時之譽

薛孺為清陽令襄城掾所經並有惠政

唐戴胄魏郡人也性正直有幹局明習律令尤曉文簿隋末為門下錄事納言蘇威黃門侍郎裴矩甚禮之劉洎字思遠南郡江陵人也少好讀書性勁躁有幹略張光輔本燉煌人也少明辨有幹局厯遷司農少卿文昌右丞及為宰相皆有能名

蕭至心景雲中受晉州刺史明於吏道甚有能名

崔日用初為芮城尉則天幸長安儲供繇陝州刺史宗楚客專以頓事委日用條白物役當煩而省楚客深加

賞歎繇是擢用新豐尉遷監察御史

顏杲卿以蔭授官性剛直有吏幹開元中為魏州錄事參軍振舉綱目政稱第一

李彭年有吏才工於剖析有當嘗之稱

裴耀卿為濟州刺史玄宗車駕東巡州當大路道里綿遠而戶口寡弱耀卿躬自條理科配得所時大駕所歷凡十餘州耀卿稱為知頓之最

蔣沈為監察御史與兄演溶弟清俱以幹局吏事擅能

名於時長史韓朝宗裴迥咸以推覆簡勾之任委之處事平允剖斷精當動為羣僚楷式

呂謹為哥舒翰支度判官性謹密勤於職務在使幕縱無事塊然獨坐不離案牘翰益親之

李麟為河東太守本道採訪處置使及安祿山反以武臣呂崇貴代之麟還京所歷皆有美稱以謹靖雅正自處

韋倫為內作使判官時宮內土木之功無虛日內作人

吏因緣為姦倫又躬親閱視省費減倍改大理評事
李若幽性剛正有吏才歷安定扶風錄事參軍皆為稱
職累遷長安令

班宏為尚書侍郎性勤恪每晨入官署至夕方歸下吏
不堪其勞故蒞職頗以清白勤幹稱

韋元甫少修謹敏於學行初任滑州白馬尉以吏術知名
本道採訪使韋陟深器之奏充支使與同幕判官員
錫齊名元甫精於簡牘錫詳於訊覆陟推誠任之時人

謠曰員推韋狀

劉蕡少以資蔭補吏累授鄠縣丞宰相杜鵑漸判官楊
炎美之

鄭玄累遷刑部尚書性嚴毅有威斷更踐劇任時稱其
能

盧士玫山東右族以文儒進性端厚與物無競雅有令
開始為吏部員外郎甚稱職轉郎中

後唐張敬詢少事武皇性勤幹時太祖收市甲馬屢濟

國難尤留意於兵仗敬詢自軍吏至牙校專掌甲坊十五年尤稱職

孟鵠本魏州案吏也莊宗初定魏博選幹吏以計兵職
鵠為度支孔目官掌邢洺錢穀司明宗時為邢洺節度
使軍賦三分之一屬霸府鵠於調算之間不至苛急每
事曲意承迎帝心甚德之而度支使孔謙專典軍賦其
於藩鎮徵督苛急帝嘗切齒及帝即位鵠時為租庸院
勾押擢為客省副使樞密院承旨當年為三司副使

晉周瓌北京晉陽人也少端直善計書自高祖歷數鎮用為腹心累職至牙門都校凡庸調出納咸以委瓌經十餘年未嘗以微累見忤帝甚重之

周邊蔚初仕後唐為華州記室莊宗之伐蜀大軍出於華下時華方闕帥詔令蔚權領軍府事供億軍須甚有幹濟之稱

冊府元龜卷八百四十四

欽定四庫全書

冊府元龜卷八百四十五 宋 王欽若等 撰

總錄部

膂力 騷捷 善武藝 執御

膂力

詩云孔武有力又云有力如虎斯蓋萬人之敵百夫之
防者也其有血氣方剛筋骨秀出憲忮自任伉健無對
絕邁乎倫品時負於壯勇誠稟賦之有殊而才力之尤

異然則恃之者亡稱之者賤聖人不語其惟力乎小民
所用在於壯爾自非處之若怯而戒之在鬪進以戇難
而禦侮退乃卷懷而若虛亦何以全養勇之道成率義
之美哉其或肆陸梁恃鷙猛謂衆莫予拒而務於勝人
是乃暴虎之徒不足算已

臯寒浞子多力能陸地行舟

蜚廉秦之先也蜚廉生惡來有力手裂虎兕蜚廉善走父子

俱以才力事紂

穎考叔鄭大夫鄭伯將伐許授兵於太宮

太宮鄭公孫祖廟也

閼與穎考叔爭車

公孫閼鄭大夫穎考叔挾輜以走轍車也子都

拔棘以逐之

子都公孫閼也棘戰也

南宮長萬宋大夫曹師伐宋長萬奔陳以乘車輦其母

一日而至

乘車非兵車駕人曰輦宋去陳二百六十里言萬之多力

宋人請南宮萬

于陳以賂陳人使婦人飲之酒而以犀革裹之比及宋
手足皆見宋人醢之

叔山冉楚人晉楚戰于鄢陵楚師薄于險

薄迫也叔山冉

搏人以投中車折軸晉師乃止

秦董父魯孟獻子家臣魯師從晉伐逼陽董父輦重如

役叔挽重車
以從師

叔梁紇魯人為鄆邑大夫從伐逼陽逼陽人啓門諸侯

之士門焉見門開故攻之懸門發紇抉之以出門者

狄虎彌魯人從晉伐逼陽叔梁紇既抉懸門虎彌建大車之輪而蒙之以甲以為櫓蒙覆也櫓大楯也左執之右拔戟

以成一隊孟獻子曰詩所謂有力如虎者也

慶舍字子之為齊大夫封之子慶封之亂驅高陳鮑之徒
个慶氏之甲樂子雅高子尾陳陳須無鮑鮑國子尾抽桷擊扉三
桷
也扉門闔也以盧蒲癸自後刺子之王何以戈擊之解
桷擊扉為期其左肩猶援廟桷動於甍以俎壺投殺人而後死言甚多

力

子期楚司馬白公勝作亂殺子期于朝子期曰昔者吾
以力事君不可以弗終拔豫章以殺人而後死以效其
多力豫

木大

孟說不知何許人秦武王有力好戲力士任鄙烏獲與說皆至大官王與說舉鼎絕臘而死臘作脉

孟賁生拔牛角

夏育衛人力舉千鈞

吾卽鴈中山之人多力也趙氏攻中山吾丘鴈衣鐵甲操鐵杖以戰而擊無不碎所衝無不陷以車投車以人投人

漢項籍字羽下相人力扛鼎扛舉也才氣過人

申屠嘉梁人文帝時為丞相初以材官蹶張

今之弩以手張者曰

臂張以足蹠者曰蹶張從高帝

上官桀隴西上邽人少時為羽林期門郎從武帝上甘泉天大風車不得行解蓋授桀桀蓋雖風嘗屬車屬連雨下蓋輒御帝奇其才力遷未央廄令

甘延壽字君况少以良家子善騎射為羽林投石拔距絕於等倫

投石以石投人也拔距者有人連坐相把據也

力超踰亭樓又言其趨捷耳非拔距也

今人猶有拔爪之戲蓋拔距之遺法

後漢蓋延漁陽人彎弓三百斤邊俗尚勇力而延以氣聞官終左馮翼將軍

祭彫字次孫有勇力能貫三百斤弓位太僕

虞延字子大力能扛鼎官終太僕

郭涼身長八尺氣力壯猛

葛龔以善文記知名性慷慨壯烈勇力過人位臨汾令
魏許褚勇力絕人漢末聚少年及宗族數千家共堅壁
以禦寇時汝南葛陂賊萬餘人攻褚壁褚衆少不敵力

戰疲極兵矢盡乃令壁中男女聚治石如杵斗者置四
隅褚飛石擲之所值皆搘碎賊不敢進糧乏偽與賊和
以牛與賊易食賊來取牛牛輒奔還褚乃出陣前一手
逆曳牛尾行百餘步賊衆驚遂不敢取牛而走繇是淮
汝陳梁間聞皆畏憚之後從太祖討韓遂馬超於潼關
太祖將北渡臨濟河先渡兵獨與褚及虎士百餘人留
南崖斷後超將步騎萬餘人來奔太祖軍矢下如雨褚
白太祖賊來多今兵渡以盡宜去乃扶太祖上船賊戰

急軍爭濟船重欲沒褚斬攀船者左手舉馬鞍蔽太祖
船舵工為流矢所中死褚右手並泝船僅乃得渡是日
微褚幾危其後太祖與遂超等單馬會語左右皆不得
從惟將褚超負其力陰欲前突太祖素聞褚勇疑從騎
是褚乃問太祖曰公有虎侯者安在太祖顧指褚褚瞋
目眄之超不敢動乃各罷後數日會戰大破超等褚身
斬首級遷武衛中郎將武衛之號自此始也軍中以褚
力如虎而癡故號曰虎癡是以超問虎侯至今天下稱

焉皆謂其姓名也

典韋陳留已吾人形貌魁梧膂力過人初平中張邈舉
義兵韋為士屬司馬趙寵牙門旗長大人莫能勝韋以
一手建之寵異其才力韋好持大雙戟與長刀等軍中
為之語曰帳下壯士有韋君提一雙戟八十斤

蜀劉封隨先主入蜀自葭萌還攻劉璋時封年二十餘
有將數人將兵俱與諸葛亮張飛等泝流洄而上所在
戰克位副軍將軍

吳韓當為孫堅別部司馬嘗從堅征伐周旋數犯危難
陷敵擒虜

董襲字元代會稽餘姚人長八尺武力過人位偏將軍
朱據字子範吳郡吳人有姿貌膂力又能論難位新都
郡丞

晉庾東以勇力聞武帝時有西域健胡趨捷無敵晉人
莫敢與較帝慕勇士惟東應選遂撲殺之名振殊俗
蔡裔少有勇力呼聲若雷嘗有盜入室裔撫几一呼賊

衆皆殞時人憚之後為兗州刺史

吳彥字士則吳郡吳人出自寒微有文武才幹身長八尺手格猛獸膂力絕羣位交州刺史

張昌本義陽蠻少為平氏縣吏武力過人

後蜀李庠為中軍騎督弓馬便捷膂力過人時論方之文鶩

宋孟龍符驍果有膽氣幹力絕人位殿中將軍

孟係祖有筋幹異力能擔負數人入隸羽林為殿中將

軍

劉唐祖新康縣男虔之子便弓馬膂力絕人

校長生出身為縣將本府以其膂力召為府將

張東有勇力手格猛獸位左將軍

南齊周山圖家業寒賤年十五六氣力絕衆食敢嘗兼數人鄉里獵戲聚嘗為主帥指麾處分皆見從位黃門郎

張敬兒南陽冠軍人好射虎南陽新野風俗出騎射而

敬兒尤多膂力求入隊為曲阿戎驛將

焦度為青州刺史顏師伯輔國府參軍師伯啓孝武稱
度氣力弓馬絕人帝召還竟左右見度身形黑壯謂師
伯曰真健物也

梁羊侃少而雄勇膂力絕人泗橋有數石人長八尺大
十圍侃執以相擊悉皆破碎位都官尚書

鄧元起字仲居南郡當陽人也少有膽幹膂力過人位

益州刺史

陳周鐵虎不知何許人梁世南渡語音僉重膂力過人位太子左衛

程靈洗少以勇力聞步行日二百餘里位安西將軍杜僧明形貌眇小而膽氣過人有勇力善騎射位平北將軍

任忠字奉誠小名蠻奴膂力過人尤善騎射位開府儀同三司

周迪少居山谷有膂力能挽彊弩以弋獵為事位平南

將軍

乙瓌代人慕化入貢世祖留之瓌便弓馬善騎射手格
猛獸膂力過人位西道都督

徐世譖字典宗居荊州為主帥征伐蠻蠻尤敢勇有膂
力善水戰

後魏于栗磾代人為冠軍將軍道武畋于白登山見熊
領數子帝謂栗磾曰能縛之乎栗磾曰能帝曰若搏之
不勝豈不虛斃一壯士耶栗磾曰自可能致御前而制

之尋擒之

崔延伯博陵人也有氣力以勇壯聞位征西將軍

韓茂字元興父耆龍驤將軍茂年十七膂力絕人尤善
騎射明元曾親征丁零翟猛茂為中軍執幢時大風諸
軍旌皆偃仆茂於馬上持幢初不傾倒明元異而問之
徵茂所屬具以狀對明元謂左右曰記之尋徵詣行在
所試以騎射明元深奇之以茂為虎賁中郎將

陸真代人少善騎射大武初以真膂力過人拜為內郎

劉尼少壯健有膂力勇果善射太武見而善之拜羽林郎中

谷渾字元冲昌黎人父袞膂力兼人彎弓三百斤勇冠一時位安南將軍

伊馥代人善射多力曳牛却行位太子太保

長孫頽善射彎弓三百斤位征南將軍

宇文福少驍果有膂力位征南將軍

鄭思明左光祿大夫連山子思明及弟思和並以武力

自効位直閣將軍

傅永字修期清河人有氣幹拳勇過人子叔偉九歲為州主簿及長膂力過人彎弓三百斤左右馳射見者以為得永之武而不得永之文也

奚康生性驍勇有武藝弓力十石為南青州刺史時梁武帝聞康生能引強弩力至十餘石故特作大弓兩張送與康生康生得弓便會集文武乃用平射猶有餘力其弓長八尺把中圍尺二寸箭麌殆如今之長笛觀者

以為希世絕倫弓即表送置之武庫

崔鳳少便弓馬壯勇有膂力

北齊侯景懷鎮人少驍勇有膂力善騎射以選為北鎮

兵

綦連猛魏元象中為中外府帳內都督梁使來聘云有
武藝求訪北人欲與相角文襄遣猛就館接之雙帶兩
鞬左右馳射兼共試力挽強梁人引弓兩張力皆三石
猛遂併取四張疊而抗之過度梁人嗟服之

後周韓雄字木蘭河東垣人也少敢勇膂力絕人工騎射有將帥材略位驃騎大將軍

竇熾字光成善騎射膂力過人位太保

宇文顯和膂力絕人彎弓數百斤能左右馳射

王勇代州武川人本名胡仁少雄健有膽決便弓馬膂力過人位大將軍

王傑少有志每以功名自許善騎射有膂力位上柱國崔說本名士約少有氣概膂力過人尤工騎射位大將

軍

楊汪字元度少兒疎好與人羣鬪拳所毆擊無不顛踣位吏部尚書

韓盛善騎射膂力過人位新平郡守

隋張威少倜儻有大志善騎射膂力過人在周數從征伐位至柱國京兆尹

和洪濟南人少有武力勇烈過人周武帝時數從征伐以戰功累遷車騎大將軍

段文振北海平原人少有膂力膽氣過人位左候大將軍

魚俱羅馮翼下邦人膂力絕人聲氣雄壯言聞數百步
弱冠為親衛累遷大都督

董純字德厚少有膂力便弓馬在周仕歷司御上士
周範偉儀姿有膂力仕隋齊王府佐

唐張士貴本名勿心嘆弘農盧氏人也膂力過人彎弓一
百五十斤左右騎射矢不虛發位左領軍大將軍

喬軌字文度京兆渭南人慷慨有志略身長八尺膂力
過人善擊劍左右馳射而頗涉書傳

梁崇義長安人以升斗給役于市井間有膂力能卷金
舒鉤後為羽林射生

衛伯玉有膂力自幼習知武藝天寶中仗劍之安西以
邊功累遷至員外諸衛將軍

康藝全為河東偏伍勇力絕人節度使馬燧以其多藝
因以藝全名之

李載義以武力稱繼為幽州屬郡守載義少孤與鄉曲之不令者遊有勇力善挽強角觝劉濟為幽州節度使見而偉之置於親軍每從征伐

梁王彥章曹南人少好勇多力太祖領四鎮擢為偏校嘗持一鐵槍重踰百斤所向無敢當者

後唐朱漢賓亳州人少有膂力形神壯偉膽氣過人位太子少保致仕

晉翟璋好勇力時目為大蟲即癡虎之稱也位左羽林

統軍

張郎年十八善射膂力過人鄉里憚之位慶州刺史周王繼弘少勇悍後唐明宗作鎮致之麾下善步鬪多力位河陽節度使

趨捷

夫有力善走剽悍勁疾斯趨捷之謂也若乃稟肖之異伉健殊尤屬方剛之際挺孔武之力跳盪輕疾絕出流類雖則一介之士亦乃百夫之特也然則壯有所用力

供時使倅倅之氣既有所取赳赳之武亦可足稱或乃恃其過人昧乎養勇失於繇禮之訓違夫率義之旨斯故輕生而晉禍者哉

蜚廉秦之先也足走千里手制兜虎以材力事商紂

圉人犖魯人

圉人掌養馬者犖
名也史失其姓

能投蓋于稷門

蓋覆也
稷門魯

南門走而自投接其尾之桷反覆門上

慶忌吳人勇為人所門走及奔馬

漢甘延壽字君况北地郁都人為羽林投石捷手絕於

等倫嘗超踰羽林亭樓繇是遷為郎試弁為期門尉以
材力愛幸為西域都護與陳湯共誅斬郅支單于封義
成侯

後漢董卓臨洮人膂力過人雙帶兩鞬左右馳射為羌
胡所畏桓帝末以六郡良家子為羽林郎後位太師
張燕常山真定人剽悍捷速過人故軍中號曰飛燕後
為平北將軍

呂布字奉先五原郡九原人也漢末以驍武給并州便

弓馬膂力過人謀已嘗以布自衛卓性剛而褊忿布嘗小失意拔手戟擲布布拳撻避之而改容顧謝卓意亦解吳虞翻會稽餘姚人為孫策功曹從策討山越策獨騎與翻相待山中得平地勸策乘馬策曰卿無馬奈何答曰翻能步行日可三百餘里自征討以來吏卒無及翻者明府試躍馬翻隨之行及大道得一鼓吏策取角自鳴之部曲識聲小大皆出遂從周旋平定三郡

晉唐彬字儒宗魯國鄒人少便弓馬好遊獵身長八尺走及奔鹿強力兼人後為前將軍領西戎校尉雍州刺史

王彌東萊人惠帝末入長廣山為羣盜彌多權略凡有所掠必豫圖成敗舉無遺策弓馬迅捷膂力過人青上號為飛豹

郭默河內懷人少微賤以壯勇事太守裴整嘗身被重甲跳三丈餘時人莫不憚之後為西中郎將豫州刺史

桓石虔荊州刺史豁之子小字鎮惡有才幹趨捷絕倫
從父在荊州於獵園中見猛獸被數箭而伏諸督將素
知其勇戲令拔箭石虔因急往拔得一箭猛獸跳石虔
亦跳高於猛獸獸伏復拔一箭以歸終冠軍將軍豫州
刺史

陳安字虎侯隴右人驍壯果毅武幹過人多力善射持
七尺刀貫甲奔及馳馬

宋傅弘之北地泥陽人也素善騎乘為建威將軍順陽

太守從高祖至長安弘之於姚泓馳道內綵服戲馬或
馳或驟往反二十里中甚有姿致羌胡聚觀者數十人
並驚悅歎息初上馬以馬鞭柄策挽致兩股內及下馬
柄折

尺天生吳興餘杭人天興之弟也天生少為隊將十人
同火屋後有一大坑廣二丈餘十人共跳之皆度惟天
生墜坑天生乃取實中苦竹剝其端使利交橫布坑內
更呼等類共跳並畏懼不敢天生曰我向已不度今者

必墜此坑中丈夫跳此不度亦何活乃復跳之往反十
餘曾無留礙衆並歎服

南齊張敬兒為雍州刺史部伍泊沔口敬兒乘舴艋過
江詣晉熙王灤中江遇風船覆左右丁壯者各泅走餘
二小吏沒船下呼呼張敬兒兩披挾之隨船覆仰嘗得
在水上如此翻覆行數十里方得迎接失所持節更給
之

王敬則晉陵南沙人也年二十餘善拍張跳刃高與白

虎幢等如此五六接無不中補挾轂隊主領細鎧左右
梁羊侃泰山梁甫人也少雄勇膂力絕人於兗州堯廟
蹋壁直上至五尋橫行得七跡後為都官尚書

蘭欽字休明幼而果決趨捷過人宋末隨父子雲在雒
陽嘗於市驅橐駝天監中兼文德主師征南中五郡諸
洞反者所至皆平欽有謀略勇決善戰步行日二百里
勇武過人善撫馭得人死力以軍功封安懷縣男

陳周文育義興陽羨人也年十一能反覆游水中數里

高跳六尺與羣兒聚戲衆莫能及後為鎮南將軍封壽昌公

黃法甄音俱字仲昭巴山新建人少勁健有膽力步行日

三百里距躍三丈頗便書疏閑明簿領出入郡中為鄉里所憚後為豫州刺史

後魏傅永廣平易陽人也有氣幹拳勇過人能手執鞍橋倒立馳騁後為平東將軍光祿大夫

傅叔偉永之子也亦能立馬上與人角騎九歲為州主

簿

楊大眼武都氏難當之孫少有膽氣跳走如飛然側出
不為一宗親顧待頗有饑寒之切太和中起家奉朝請
時孝文自代將南伐令尚書李冲與選征官大眼往求
焉冲弗許大眼曰尚書不見知聽下官出一伎便出長
繩三丈許繫髮而走繩直如矢馬馳不及見者莫不驚
歎冲曰自千載以來未有逸才若此者也遂用為軍主
大眼顧謂同寮曰吾之今日所謂蛟龍得水之秋自此

一舉終不復與諸君齊列矣未幾遷為統軍從孝武征宛
葉襄鄧九江鍾離之間所經戰陣莫不勇冠六軍

伊馥代人少而勇健走及奔馬善射多力位終太子太

保平尚書事

爾朱兆字萬仁榮從子也少驍猛善騎射手格猛獸矯
捷過人數從榮遊獵至於窮巖絕澗人所不能升降其
兆必先之榮以此特加賞愛任為爪牙以軍功為平遠

將軍步兵校尉

後周韓果字阿六拔代州武川人驍雄善騎射從賀拔岳西征為岳帳卒果膂力絕倫被甲荷戈昇陟峯嶺猶涉平路雖數十百日不以為勞以功授宣威將軍後從大軍破稽胡於北山胡地險阻人迹罕至果進兵窮討散其種落稽胡憚果勁健號為著翅人太祖聞之笑曰著翅之名寧減飛將

達奚震字猛略代人也同州刺史武之子少驍勇便騎射太祖嘗於渭北較獵兔過太祖前震與諸將競射之

馬倒而墜震足不傾蹠因步走射之矢發中兔顧馬纔起遂迴身騰上太祖喜曰非此父不生此子乃賜震雜絳百段震後累遷上柱國

隋賀若敦仕周文為都督封安陵縣伯嘗從太祖較獵於甘泉宮時圍人不齊獸多逃逸太祖大怒人皆股戰圍內惟有一鹿俄亦突圍而走敦躍馬馳之鹿上東山敦棄馬步逐至山半便掣之而下太祖悅諸將因得免

責

長孫晟，邇過人。年十八為後周司衛上士。

崔弘度，年十七，周大家宰宇文護引為親信軍校都督。累轉大都督時，護弟中山公訓為蒲州刺史。令弘度從焉。嘗與訓登樓，至上層去地四五丈，俯臨之。訓曰：「可畏也。」弘度曰：「此何足畏？」欵然擲下，至地無損傷。訓以其拳捷大奇之。

麥鐵杖，始興人。驍勇有膂力，日行五百里，走及奔馬。陳宣帝大建中，聚結為盜，俘役為官戶，配執御傘。每罷朝

後行百餘里夜至南徐州踰城而入行光火劫盜旦還及牙時仍又執傘如此者十餘度物主識之州以狀奏朝士見鐵杖每旦嘗在不之信也後數告變尚書蔡徵曰此可驗耳於仗下時購以百金求人送詔書與南徐州刺史鐵杖出應暮齋勅而往明旦及奏事帝曰信然為盜明矣惜其勇捷誠而釋之陳亡後徙居清流縣遇江東反楊素遣鐵杖覘賊後叙戰勲不及鐵杖遇素馳驛歸于京師鐵杖步追之每夜則同宿素見而特悟奏

授儀同三司以不識書放還鄉里成陽公李徹稱其驍武

沈光字總持少驍捷初建禪定寺其中幡竿高十餘丈適遇繩絕非人力所及諸僧患之光見而謂僧曰持繩來當相為上耳諸僧驚喜因取而與之光乃銜索拍竿而上直至龍頭繫繩畢手足皆放透空而下以掌據地倒行數十步觀者駭悅莫不嗟異時人號為肉飛僊從煬帝攻遼東以衝梯擊城竿長十五丈光昇其端臨城

與賊戰短兵接殺十數人賊競擊之而墜未及於地適遇竿有垂絰光接而復上帝望見壯異之即拜朝散大夫

史萬歲少英武善騎射驍捷若飛後以軍功拜上大將軍

宇文忻字仲樂幼而敏惠年十二能左右馳射驍捷若飛位至右領軍大將軍

權武拜開府襲爵齊郡公武少勁果能重甲上馬嘗

倒投於井未及泉復躍而出其拳勇如此頻以軍功增
邑終右屯衛大將軍

唐高開道世家寒微煮鹽以自給少而驍捷走及奔馬
後為尉州總管

趙持滿工書善射力搏猛獸捷及奔馬改為涼州都督
府長史而親仁愛士多所交結在涼州嘗逐野馬自從
射之無不洞于胸腋邊人深伏之

史敬奉靈武人為本軍牙將形甚短小若不能勝衣至

于野外馳逐能擒奔馬自執鞍勒隨鞍躍上然後羈帶
矛矢在手前無強敵

漢史弘毅字化元少游俠無行拳勇健步日行二百里
走及奔馬高祖時為侍衛親軍都指揮使

周王進幽州良鄉人為人勇悍走及奔馬符彥超為河
朔郡守以略誘寘之左右長興初彥超領鎮安州屬王
希全構亂令進變狀聞於朝廷明宗賞其迅速錄寧衛

將軍

善武藝

弧矢之妙擊刺之能皆古人之所尚俠少之所務也其有忠信為質拳勇絕人既蘊其壯心又輔之武藝復有負彼英姿目為飛將稍著折樹之名騎擅驚軍之號而能奉上盡節臨難不免此皆百夫之雄足以垂之不朽儻或心蓄姦賊志在飛揚雖使刀矛俱發左右馳騁所謂勇而無禮徒為兆亂之本者也

荆軒衛人也衛人謂之慶卿既而之燕燕人謂之荆卿

荆卿好讀書學擊劍以說衛元君元君不用

漢司馬相如字長卿通西南夷拜中郎將少時好讀書學擊劍

魏典韋陳留人仕太祖至校尉好持大戟與長刀軍中為之語曰帳下壯士有典君提一雙戟八十斤嚴翰字公仲器性重厚篤好擊劍

晉楊濟字文通厯位鎮南征北將軍武帝重兵官多授貴戚清望濟以武藝號為稱職

桓玄字靈寶襲爵南郡公在江陵甚豪橫士庶畏之過
於刺史殷仲堪玄於仲堪廳事前戲馬以稍擬仲堪仲
堪中兵參軍劉邁在座謂玄馬稍有餘精理不足仲堪
為之失色

陳安為劉曜將後叛曜自稱大將軍雍涼秦梁四州牧
涼王曜使其將軍平先立中伯率勁騎追安安與壯士
十餘騎於陝中格戰安左手奮七尺大刀右手執丈八
蛇矛近交則刀矛俱發輒害五六遠則雙帶鞬服左右

馳射平先亦壯健絕人與安搏戰三交奪其蛇矛及安死隴上歌之曰隴上健兒有陳安軀幹雖小腹中寬驥驥文馬鐵鋸鞍七尺大刀奮如湍丈八蛇矛左右盤十盪十決無當前

南齊王宜興為屯騎校尉與黃回同石頭之謀宜興拳捷善舞刀梢回嘗使十餘人以水交灑不能著

周盤龍北蘭陵人為征虜將軍濟陽太守世祖數擣武帝令盤龍領軍校尉騁稍

陳天福為前軍將軍善馬稍至今諸將法之

梁羊侃為大軍司高祖時車駕幸樂遊苑侃預宴時少府奏新造兩刀稍成長二丈四尺圍一尺三寸帝因賜侃河南國紫骝馬令試之侃執稍上馬左右擊刺特盡其妙觀者登樹帝曰此樹必為侍中折矣俄而果折因號此稍為折樹稍

王神念為爪牙將軍少善騎射既老不衰嘗於高祖前執二方梢左右交度馳馬往來冠絕郡伍有楊華者能

作驚軍騎並一時妙捷

後魏來大干為騎都尉驍果善騎射永興初襲爵遷中
散至於朝賀之日大干嘗著御鎧盤馬殿前朝臣莫不
嗟歎

于栗磾代人也為冠軍將軍左右馳射武藝過人好持
黑矟以自標明元時拜黑矟將軍

北齊尉興敬幽州刺史長命之子便弓馬有武藝高祖
引為帳內都督

獨孤楷少謹厚便弄馬槊為宇文護執刀累轉車騎將軍

田式字顯標為襄州總管性剛果多武藝拳勇過人
燕榮字貴華高祖受禪為大將軍性剛嚴有武藝擊突厥有功

唐單雄信為李密將少驍健尤能馬上用槍密軍號為飛將

羅士信始年十四為滎陽通守張須陁執衣遇翟讓來

寇士信因請自効須隨小之士信重著一甲左右雙鞬
躍而上馬陣方列士信執長槍立於馬上馳至賊所刺
倒數人斬一人首擲於空中用槍承之戴以略陣賊衆
愕然莫敢逼者士信乃棄鞍馳馬為十上十下而還
秦叔寶為上柱國封翼國公每從太宗征伐敵中有驍
將銳卒炫燿人馬出入來去太宗輒命叔寶往取叔寶
應命躍槍而進必刺之萬衆之中

哥舒翰初為別將吐蕃寇邊翰拒之于苦拔海吐蕃之

衆三道從山相續而下翰持半段槍當兵鋒逆擊之無
不摧靡又擊其次軍復走又擊其後軍皆大破之繇是
知名翰有家臣曰左車年十五每隨翰入陣翰善使槍
追賊及之以槍搭其肩而喝之賊驚顧翰從而刺其喉
皆剔高三五丈而墜左車輒下馬斬其首率以為常
王難得有膽力天寶初吐蕃大寇河源軍難得以騎將
為軍鋒贊普有子曰琅支都恃其驕悍乘諳真馬寶鈿
裝鞍軍前求較鬪者難得橫槍突往刺殺之斬其首以

其馬歸軍使以聞玄宗召至御殿問之因令馳突作殺琅支都狀壯之賜以錦袍拜羽林將軍

郭子儀初以武舉補左衛長史累以武藝登科為諸軍使李懷光為朔方節度少從軍為朔方死將以武藝壯勇稱朔方節度使郭子儀禮之益厚

李觀德宗時為四鎮北庭節度使少習武藝沈厚寡言有將帥識度

梁王敬義潁州汝陰人為武寧軍節度使敬義魁傑沈

勇多力善戰所用槍矢皆以純鐵鍛就槍重三十斤摧
鋒突陣率以此勝

王彥章少從軍嘗持鐵槍衝堅陷陣敵人畏之目之為
王鐵槍後至正國軍節度使

王景仁廬州合肥人材質魁偉性暴率無威儀善用槊
頗推驍悍後至檢校太尉同平章事

王重師潁川長社人也唐天祐中為雍州節度使同平
章事材力兼人沈默大度臨事有權變劖稍之妙冠絕

於一時中和末蔡寇陷許昌重師脫身而來太祖異其狀貌乃綵于拔山都每於軍前效用頗出儕類

晉襄從簡陳州人天福初為許州節度使世以屠羊為事力敵數人善用槊初事唐莊宗為小校攻取城邑召人為梯頭從簡多應募焉

安審暉為邢州節度使器局謹重從父戰陣武藝絕人起家長直軍副兵馬使

執御

仲尼曰吾何執吾執御矣若夫銜勒無失則控御有力
輓軌斯正則夷險可履況乎任重致遠而徐疾以攸宜
自邇陟遐故驅馳而莫擬蓋競畏之無斁信動靜而有
常若乃蹉跌稍失用舍不精非徒敗律喪師抑亦失身
隕志其為執御可不慎歟

商費昌夏桀之時去夏歸商為湯御以敗夏桀于鳴條

孟戲中衍太戊聞而卜之使御尹遂致使御而妻之

周造父以善御幸於穆王得驥溫驪溫一作盜為馬純頭驪黑色馬驥

骝色如華而赤今名馬驥
驥赤者為東驥驥馬赤也驥耳之駒
生驥耳八駿皆來見以一驥馬是
因其毛色為名西巡狩樂而忘歸

奄父公仲宣王伐戎以為御

縣貢父魯公及宋人戰于乘丘縣貢父御

縣貢氏也凡

車右勇力卜國為右馬驚敗績驚奔失列公墜佐車授綏車

為之

之或曰佐公墜佐車授綏車

公曰末之卜也末之猶微哉言卜國無

縣貢父曰他日

不敗績而今敗績是無勇也

公他日戰其御馬未嘗驚奔遂死之人

赴敵圍人浴馬有流矢在白肉

圍人掌養馬者白肉服裏肉

公曰非而死

其罪也

流矢中馬非御與右之罪也

遂誅之

誅其赴敵之功以為謚

步揚晉人秦穆公侵晉至于都

都晉地韓原

惠公謂慶鄭曰

寇深矣若之何對曰君深其怨能淺其寇乎卜右慶鄭

吉公曰鄭也不遂以家僕徒為右步揚御戎

戎御公戎車

梁繇靡御韓簡虢射為右以承公晉師潰戎馬還漳而止

梁繇靡御韓簡輶秦公將止之

輶迎止獲也

慶鄭曰釋來救

君亦不克救遂止于秦

許伯楚人邲之戰許伯御樂伯攝叔為右以致晉師許

伯曰吾聞致師者御靡旌麾壘而還

靡旌疾馳也摩近也

樂伯曰

吾聞致師者左射以戢

左車左史戢矢之善也

代御執轡御下兩

馬掉鞅而還

兩也示閒暇

也掉正攝叔曰吾聞致師者右入壘

折馘

折馘斷耳執俘而還皆行其所聞而復

邴夏齊人鞍之戰邴夏御齊侯逢丑父為右晉解張御

郤克鄭丘緩為右郤克傷於矢流血及屨未絕鼓音

中軍

將自執旗鼓故雖傷而擊鼓不息曰余病矣張侯曰自始合而矢貫余

手及肘余折以御左輪朱殷豈敢言病吾子忍之

張侯解張

也朱血色血色久則殷殷音近烟人謂赤
黑為殷色言血多汚車輪御猶不敢息 緩曰自始合

苟有險余必下推車子豈識之然子病矣以其不識已推車 張

侯曰師之耳目在吾旗鼓進退從之此車一人殿之可

以集事殷鎮也集成也若之何其以病敗君之大事也擐甲執

兵固即死也病未及死吾子勉之左并轡右援枹而鼓

馬逸不能止師從之晉師從郤克車齊師敗績韓厥將戰夢子

輿謂已曰且辟左右子與韓厥父故中御而從齊侯居中代御者自

非元師御者皆在中將左右邴夏曰射其御者君子也公曰謂之君

子而射之非禮也

齊侯不
知戎禮

射其左越于車下射其右斃

于車中

鄭無正

鄭無正大夫王良也

晉人鐵之戰趙簡子曰鄭人擊我伏

弢

弢弓衣

流血鼓音不衰今日之事莫我若也衛莊公為

右

莊公奔晉簡子將納之故為右

曰吾九登九下擊人盡殪今日之事

莫我加也鄭無正曰吾兩鞅將絕吾能止之今日之事

我御之上也駕而乘材

材木橫

兩鞅皆絕一云趙簡子使

王良與嬖奚乘終日而不獲一禽嬖奚反命曰天下之

賤工也或以告王良良曰請復之彊而後行一朝而獲十璧奚反命曰天下之良工也良請辭曰吾為範御終日不獲一為之詭遇一朝而獲十

範法也說
不依法也

東野畢魯人以善御聞定公問于顏闔曰東野畢之御善乎對曰善則善矣然其馬將佚定公不說入謂左右曰君子固誣人乎三日而牧來謁之曰東野畢之馬佚兩驂引兩服入既定公越席而起召顏闔曰子言東野畢其馬將佚不識何以知之對曰臣以政知之昔者舜

巧于使民而造父巧于使馬舜不窮其民造父不窮其馬是以舜無佚民造父無佚馬今東野畢之御上車執轡御體正矣步驟馳騁朝禮畢矣厯險致遠其方盡矣然而求馬不已是以知之公曰善哉

宛射犬鄭人楚子伐鄭諸侯救鄭晉侯使張輅輔蹠致楚師求御于鄭卜宛射犬吉使御廣車而行

尹需學御三年而無得焉嘗寢想之

寢卧

思之中夜夢受秋

駕於師

秋駕美御之師

明日往朝望而謂之曰吾非愛道於子

也恐子不可予也今日將教子以秋駕尹承而反走北面再拜曰臣有天幸今夕因夢受之

漢祕彭祖以卒開沛城門為太公僕又為中廡令擊陳豨封戴侯

夏侯嬰為沛廄司御高祖為沛公以嬰為太僕嘗奉車為沛公御車也

荀彘太原廣武人以御見為侍中以善御得見
因為侍中也

晉王湛宗族皆以為痴兄子濟詣湛既而辭去湛送至

門濟有從馬絕難乘濟問湛曰叔頗好騎否湛曰亦好之因騎此馬姿容既妙迴策如榮善騎者無以過之後至汝南內史

宋劉德願孝武時為豫州刺史善於御車嘗立兩柱使其中通車軸乃於百餘步上振轡長驅未至數尺痛與牛杖從柱間直過其精如此世祖聞其能乃為之乘畫輪車幸太宰江夏王義恭第德願著龍冠短朱衣執轡進止甚有容狀上欣歎賞賜甚厚

唐齊映為御史中丞從德宗幸梁州映嘗執轡會御馬
遽駭奔跳頗甚帝懼傷映令舍轡映堅執久之乃止帝
問其故曰馬奔踶不過傷臣苟捨之或犯清塵雖臣萬
死何以塞責上嘉獎無已



冊府元龜卷八百四十五

欽定四庫全書

子部

冊府元龜卷八百四十六

詳校官中書臣孫球

侍讀臣孫球覆勘

總校官庶吉士臣何思鈞

校對官中書臣楊世綸

謄錄監生臣周元梓

欽定四庫全書

冊府元龜卷八百四十六 宋 王欽若等 撰

總錄部

善射

周官保氏之職教國子以六藝其三曰射仲尼亦曰吾何執執射乎蓋弦剡之制聖人所以威天下桑蓬之訓男子所以志四方射之時義遠矣哉中古以還乃有應機之命中挽彊徹札善其事而著稱者焉至或飲羽斃

獸郤敵紓難威讐於羌虜身獲於榮爵亦比比有之詩曰舍矢如破又曰舍拔則獲皆善射之謂矣

有窮后羿善射

有窮國名后君也羿君之號

逢蒙學射於羿盡羿之道

賈大夫惡貌醜取妻而美三年不言御以如臯射雉獲之

其妻始笑而言

樂伯為楚大夫與晉戰於邲許伯御樂伯攝叔為右以致晉師晉人逐之左右角之

張兩角後旁夾攻之

樂伯左射馬而

右射人角不能進矢一而已麇興於前射麋麗龜麗者
背文隆高
當心者晉鮑癸當其後使攝叔奉麋獻焉曰以歲之

非時獻禽之未至敢膳諸從者鮑癸止之曰其左善射其右有辭君子也既免止不復逐之

養由基楚大夫善射去楊葉百步而射百發百中楚共王及晉侯鄭伯戰於鄢陵潘廷之黨與養由基蹲甲而射之徹七札焉黨潘廷之子蹲聚也一發達七札言其能陷堅以示王曰君有二臣如此何憂於戰二子以射誇王王怒曰大辱國賤其不尚智謀詰

朝爾射死藝

言女以射自多必當以藝死也

及戰呂錡射共

王中目王召由基與之兩矢使射呂錡中項伏弢

弢弓

以一矢復命後楚師薄

薄迫

於險叔山冉謂基曰雖君

有命為國故汝必射

王有死藝命

乃射再發盡殪楚王有白

猿王自射之則搏矢而熙

熙戲

使養食其射之

食其即基也始

調弓矯矢未發猿擁樹號矣

熊渠子夜行見寢石以為伏虎彎弓射之沒金飲羽下

視知其石也因復射之矢摧迸火

商陽為工尹與陳棄疾追吳師及之

工尹楚官名棄疾
楚公子棄疾以魯

昭八年帥師滅陳縣之楚人善之因號焉至二十年楚子狩於州來使蕩侯潘子司馬督囂尹午陵尹喜帥師

徐以懼吳於時有吳師陵或作凌楚聲陳棄疾謂工尹商陽曰王事也子

手弓而可手弓子射諸

商陽仁不忍傷
商陽仁不忍傷

人以王事勸之射之斃一人

弓不忍復射斃
弓不忍復射斃

又及謂之又斃二人每斃一人揜其目

揜其目不
恩視之

止其御曰朝不坐燕不與殺三人亦足以反

命矣

朝燕於寢大夫坐於上士立於下然則陽與御者皆士也兵車參乘射者在左戈盾在右御在中矣

孔子曰殺人之中又有禮焉

公孫丁為衛獻公御。公出奔齊。孫氏追之初。尹公佗學

射於庾。公差庾。公差學射於公孫丁。二子追公

二子子魚庚公與差為

孫氏子魚曰：射為背師不射為戮。射為禮乎？

子魚庚公差禮射不

求射兩軻而還

軻車輶

尹公佗曰：子為師我則遠矣。乃

反之

佗不從丁學故言遠始與公差俱退悔而還射丁

公孫丁受公轡而射之

貫臂

貫佗

洩聲子魯大夫齊師將納昭公使公子鉏率師從公圍

成師與齊師戰於炊鼻

季氏師距公炊鼻魯地

齊子淵捷從洩聲

子射之中楯瓦

瓦 楚

繇胸汰輜匕入者三寸

入楯瓦也 胸車輜輒

車轍繇過也 汗矢
也匕矢鏃也

聲子射其馬斬鞅殞

顏高魯人定公侵齊門於陽州

攻其門

士皆坐列

言無關志

曰

顏高之弓六鈞

三十斤為鈞六鈞百八十斤古稱重故以為異彊

皆取而傳觀

之陽州人出顏高奪人弱弓籍丘子鉏擊之與一人俱

斃

子鉏齊人

偃且射子鉏中頰殪

子鉏
死

顏息魯人定公侵齊門於陽州顏息射人中眉退曰我

無勇吾志其目也

以矜

公孫林鄭大夫齊輸范氏粟鄭子姚子般送之趙鞅禦

之遇於戚鄭師大敗趙孟喜追鄭師姚般公孫林殿而

射前列多死

晉前言雖小國猶有善射者

趙孟曰國無小

言雖小國猶有善射者

更羸魏人與魏王處廡下有鴈從東方來更羸虛發而

鴈下

漢季廣隴西人世世受射

受射法

文帝十四年匈奴大入

蕭關而廣以良家子從軍擊胡用善射殺首虜多為郎
騎常侍廣為上郡太守匈奴侵上郡帝使中貴人從廣

內臣之勤習兵擊匈奴中貴人者將數十騎從將數十騎自隨

在大軍前行而忽遇敵也

見匈奴三人與戰射傷中貴人殺其騎且

盡中貴人走廣走趣

也

廣曰是必射鵠者也廣乃從百騎

往馳三人逐之疾馳而

三人亡馬步行行數十里廣令其騎

張左右翼旁引其騎若鳥翼之馬

而廣身自射彼三人者殺其二

人生得一人果匈奴射鵠者也廣嘗出獵見草中石以

為虎而射之中石沒鏃視之石也他日射之終不能入

矣廣所居郡聞有虎嘗自射之及居右北平射虎虎騰

傷廣廣亦射殺之其射見敵非在數十步之內度不中
不發發即應弦而倒用此其將數困辱及射猛獸亦數
為所傷廣為人長猿臂臂如猿臂通背其善射亦天性雖子孫
他人學者莫能及廣呐口少言與人居則畫地為軍陳
射闊狹以飲專以射為戲

張隆景帝時為輕車武射以善射帝幸近之

霍去病武帝時以皇后姊子年十八為侍中善騎射

堂邑父胡人善射與張騫使月支留匈奴中窮急射禽

獸給食歸漢拜為奉使君

呂布為奮武將軍時袁術遣將紀靈等攻劉備於徐州
布救之屯沛城外請靈等與共饗飲布曰備吾弟也為
諸君所困故來救之布性不喜合鬪但喜解鬪耳乃令
軍候植戟於營門布彎弓顧曰諸君觀布射戟小支中
者當各解兵不中可留決鬪布即一發正中戟支靈等
皆驚言將軍天威也

魏成公英西域人從太祖出獵有三鹿走過前太祖命

英射之三發三中皆應弦而倒太祖抵掌謂之曰事韓文約可謂盡節而孤獨不可乎

成公英昔事韓遂遂字文約

後詔英

作涼州平隴右病卒

王明山父凌坐楚王事司馬宣王誅之明山走向大原追軍及之時有飛鳥集桑樹隨低昂明山舉弓射之即倒追人乃止不復進

蜀糜竺為安漢將軍子威官至虎賁中郎將威子炤虎騎監自竺至炤皆便弓馬善射御

吳太史慈猿臂善射弦不虛發嘗從孫策討麻保賊賊於屯裏緣樓上行署以手持樓棼慈引弓射之矢貫手著棼圍外萬人莫不稱善其妙如此位至折衝中郎將朱才字君業為偏將軍為人精敏善騎射大帝愛異之嘗侍從遊戲

晉魏舒為後將軍鍾毓長史毓每與參佐射舒嘗為畫籌而已後遇朋人不足以舒滿數毓初不知其善射舒容範閑雅發無不中舉坐愕然莫有敵者毓歎而謝曰

吾之不足以盡卿才有如此射矣豈一事哉

王濟字武子為河南尹未拜坐鞭王官吏免官王愷以帝舅晉豪有牛名八百里駭嘗瑩其蹄角濟請以錢千萬與牛對射而賭之愷亦自恃其能令濟先射一發破的因據胡牀叱左右速探牛心來須臾而至一割便去尋以白衣領太僕卒

楊濟字文通歷位鎮南征北將軍嘗從武帝較獵北邙下與侍中王濟俱著布袴褶騎馬執角弓在輦前猛獸

突出帝命王濟射之應弦而倒須臾復一出濟受詔又射殺之六軍大呼稱快

庾翼爲都督征討諸軍事師次襄陽大會僚佐陳旌甲親授弧矢曰我之行也若此射矣遂三起三疊徒衆屬目其氣十倍

謝尚爲建武將軍江夏相時安西將軍庾翼鎮武昌尚數詣翼諮謀軍事嘗與翼共射翼曰卿若破的當以鼓吹相賞尚應聲中之翼即以其副鼓吹給之

桓石秀善騎射發則命中位至寧遠將軍

陳安為劉曜所圍突圍而出雙帶兩鞬左右馳射

前燕慕容根善射嘗從慕容皝行獵有一野羊立於懸

崖皝命左右射之莫有中者根自求射一發中之

賈堅字世固彎弓三十石餘慕容恪取一牛置百步上

召堅使射堅曰少壯之時能令不中今已年老正可中

之恪大笑射再發一矢拂脊一矢磨腹皆附膚落毛上

下如一恪曰復能中乎堅曰所貴以下中為奇中之何

難一發中之堅時年已六十餘矣觀者咸服其妙
慕容翰既之庶兄皝素忌之皝既嗣位翰北投宇文歸
既而逃歸乃遣勁騎百餘追之翰遙謂追者曰吾既思
戀而歸理無反面吾之弓矢汝曹足知無為相逼自取
死也吾處汝國久願不殺汝汝可百步豎刀吾射中者
汝便宜反不中者可來前也追騎解刀豎之翰一發便
中刀鐸追騎乃散

慕容盛初逃難東歸遇盜陝中盛曰我六尺之軀入水

不溺在火不焦汝欲當吾鋒乎試豎爾手中箭百步我若中之宜慎爾命如其不中當束身相授盜乃豎箭盛一發中之盜曰郎貴人之子故相試耳資而遣之

宋劉榮祖北中郎將懷慎之子少好騎射為高祖所知及盧循攻逼懷慎戍在石頭時賊乘小艦入淮援柂高祖宣令三軍不得輒射賊榮祖不勝忿怒冒禁射之所中應弦而倒高祖益奇焉

卜天興父名祖高祖聞其有幹力召補隊主從征伐天

興善射弓力兼倍容貌嚴正笑不解顏太祖以其舊將子使教皇子射位至廣威將軍

臧熹習騎射志在立功嘗至溧陽縣令阮崇與熹共獵值虎突圍獵徒並奔散熹直前射之應弦而倒

南齊垣僖伯少負氣豪俠妙解射雉尤為武帝所重以為直閣將軍

柳世隆與瑯琊王瞻博射嫌其皮闔乃摘梅帖鳥味之上發必命中觀者驚駭位至左光祿大夫

張敬兒年少便馬有膽氣好射虎發無不中位至開府儀同三司

劉繪為寧朔將軍雖豪俠嘗惡武事雅善博射未嘗跨馬

梁曹景宗新野人父欣之仕宋為徐州刺史景宗善騎射好畋獵嘗與少年數十人澤中逐麋鹿每還騎赴鹿鹿馬相亂景宗於衆中射之人皆懼中馬足鹿應弦輒斃以此為樂未弱冠欣之於新野遣出州以匹馬將數

人於中路卒逢蠻賊數百圍之景宗帶百餘箭乃馳騎四射每箭殺一蠻遂散走

陳褚玠剛毅有膽決善騎射嘗從司空侯安都於徐州出獵遇有猛虎玠引射之再發皆中口入腹俄而虎斃位至御史中丞

樊毅累葉將少習武善射毅弟猛幼倣儻既壯便弓馬位至護軍將軍

後魏長孫顏嵩子也善騎射彎弓三百斤位至征南大

將軍畋獵方山有兩狐起於御前詔頽射之百步狐俱獲

楊播為右衛將軍時孝文曜威沔水上已設宴帝與中
軍彭城王勰賭射左衛元遙在勰朋內而播居帝邊遙
射侯正中籌限已滿帝曰左衛籌足右衛不得不解播
對曰仰恃聖恩庶幾必爭於是彎弓而發其箭正中帝
笑曰養由基之妙何復過是遂舉卮酒以賜播曰古人
酒以養病朕今賞卿之能可謂今古之殊也

奚康生少驍武彎弓十石矢異尋常宣武聞之故作大
弓兩張長八尺把中圍尺有二寸箭麿殆如今之長
笛送康生康生便集文武用之平射猶有餘力觀者以
為絕倫康生為中堅將軍時蕭鸞置義陽招誘邊民康
生復為統軍從王肅討之進圍其城鸞將張休護自昇
城樓言辭不遜肅令康生射之以強弓大箭望樓射窓扉
即入應箭而斃彼民見箭皆云強弩以殺休護賞帛一千疋又頻箭再捷其軍賞三階帛五百疋

爾朱兆榮之從子驍勇善騎射榮曾送臺使見二鹿乃命兆前止授二箭曰可取此鹿供今食也遂停馬構火以待之俄而兆獲其一榮欲矜誇使人責兆曰何不盡取杖之五十位至領軍將軍領左右并州刺史

賀拔岳初為太學生長以弓馬為事與父兄赴援懷朔賊王衛可瓊在城西三百餘步岳乘城射之箭中瓊臂賊衆大駭拔岳為西道都督能左右馳射與爾朱天光討万俟醜奴岳守長安時万俟醜奴遣大行臺尉遲苦

薩向武功南渡渭水攻圍趣柵天光遣岳率騎一千馳往赴救菩薩攻柵已還據岐州岳以輕騎八百北渡渭水擒賊令殺掠其民以挑菩薩菩薩果率步騎二萬餘人至渭水北岳以輕騎數十與菩薩隔水交言岳稱楊國威菩薩自言強盛往復數返菩薩乃自憐令省事傳語岳怒曰我與菩薩言卿是何人與我對語省事恃水應答不遜岳舉弓射之應弦而倒

尉多侯弟子慶賓善騎射有將略高祖時釋褐員外散

侍郎稍遷左將大中大夫

北齊斛律金朔州勑勒部人善騎射初為軍主與懷朔
鎮將楊鈞送蠕蠕主阿那瓌還北瓌見金射獵深歎其

工

暴顯少經軍旅善於騎射魏末從孝莊帝出獵一日之
中手獲禽獸七十三

斛律光字明月羨字豐碓皆太師金之子少工騎射其
父每日令其出獵還即較所獲禽獸光所獲或少必麗

龜達腋羨雖獲多非要害之所光嘗蒙賞美或被捶撻
人問其故金答云明蟾必背上著箭豐雒隨處即下手
其數雖多去兄遠矣聞者咸服其言嘗從金西征周文
帝長史莫者暉在行間光年十七馳馬射中之因擒於
陣神武即擢授都督封永樂子又嘗從文襄出野見鴈
雙飛來帝使馳射之二矢俱落又從於洹橋較獵見一
大鳥雲表飛颺光引弓射之正中其頸此鳥形如車輪
旋轉而下至地乃大鵠也文襄取而觀之深壯異焉承

相屬邢子高見而歎曰此射鵠手也當時轉號落鵠都督位至左丞相

皮景和善騎射事神武為親信副都督武定二年征步落稽文襄疑賊為有伏兵今景和將五六騎深入一谷中值賊百餘人便共格鬪戰景和射數十人莫不應弦而倒神武曾令射一野豕一箭而獲之深見嗟賞天統二年為侍中周通好之後冠蓋來往嘗令景和對毎與使同射百發百中甚見推崇

元景安為車騎大將軍孝昭曾與功臣於西園饌射文
武預者二百餘人設塳去堂百四十餘步中的者賜以
良馬及金玉錦綵等有一人射中獸頤去鼻寸餘唯景
安最後有一矢未發帝令景安解之景安徐整容儀操
弓引滿正中獸鼻帝嗟賞稱善特賞馬兩疋玉帛雜物
又加常等

後周寶熾仕魏為武厲將軍孝武即位蠕蠕等諸蕃並
遣使朝貢帝臨軒宴之有鵠飛鳴於殿前帝素知熾善

射因欲示遠人乃給熾御箭兩隻命射之鳩乃應弦而落諸蕃人咸歎異焉帝大悅賜帛五十疋太祖田於渭北令熾與晉公護分射走兔熾一日獲十七頭護十一頭

宇文顯和性矜嚴頗涉經史膂力絕人彎弓數百斤能左右馳射顯和初從魏孝武入關至漆水太祖素聞其善射而未之見也俄而水傍有一小鳥顯和射而中之太祖笑曰我知卿工矣其後引為帳內大都督

宇文貴魏末從文帝在天遊園以金卮置侯上令公卿射中者即以賜之貴一發而中帝笑曰由基之妙正當爾耳位至小司徒

王傑為驃騎大將軍魏恭帝元年從於謹圍江陵時柵內有人善用長矟戰士將登者多為所斃謹令傑射之應弦而倒登者乃得入餘衆繼進遂拔之謹喜曰濟我大事者在公此箭也

李遠嘗校獵於莎柵見石於聚薄中以為伏兔射之而

中鏃入寸餘就而視之乃石也太祖聞而異之賜書曰昔李將軍廣嘗有此事公今復爾可謂世載其德雖熊渠之名不能獨擅其美位至柱國大將軍

尉遲綱迥之弟迥率衆伐蜀綱從太祖送之於城西見一走兔太祖命綱射之誓曰若獲此兔必當破蜀俄而綱克兎而返太祖喜曰事平之日當賞汝佳口及克蜀賜綱侍婢二人嘗從太祖北狩雲陽值五鹿俱走綱獲其三每遊宴太祖以珍異之物令諸功臣射而取之綱

所獲輒多位至陝州總管

賀拔勝長於喪亂之中尤工武藝走馬射飛鳥十中其五六後從太祖宴於昆明池時有雙亮遊於池上太祖乃授弓矢於勝曰不見公射久矣請以為歡勝射之一發俱中位至太師

李景為儀同三司驍勇善射平齊之役頗有力焉

豆盧寧少驍果有志氣身長八尺美容儀善騎射以別將隨爾朱天光入關以破萬俟醜奴嘗與梁企定遇於

平涼川相與肄射乃於百步縣莎草以射之七發五中企定時以為能贈遺甚厚

賀若敦少有氣幹善騎射初從獨孤信於雒陽被圍敦
彎弓三石箭不虛發位至中州刺史

史雄大將軍寧之子年十四從寧於率毛山奉迎太祖
仍從較獵弓無虛發太祖歎異之位至駁中大夫

隋長孫晟善彈工射趨捷過人初周室尚武貴遊子弟
咸以相矜每共馳射時皆出其下年十八為司衛上士

歲使突厥嘗有二鶻飛而爭肉突厥攝圖以兩箭與歲
曰請射取之歲乃彎弓馳見羣鶻相攫遂一發而雙貫
焉開皇中歲持節護突厥突厥悅附尋以突厥染干為
意彌豆啓人可汗賜射於武安殿選善射者十二人分
為兩朋啓人曰臣繇長孫大使得見天子今日賜射願
入其朋許之給歲箭六隻發皆中鹿啓人之朋竟勝時
有鳶羣飛高祖謂歲曰公善彈為我取之十發俱中並
應丸而落是日百官獲賚歲獨居多位至右驍衛將軍

史萬歲少邇捷尉迥之亂萬歲從梁士彥擊之軍次馮翊見羣鴈飛來萬歲謂士彥曰請射行中第三者既射之應弦而落三軍莫不悅服位至河州刺史

賀若弼為武侯大將軍嘗遇突厥入朝高祖賜之射突厥一發中的帝曰非賀若弼無能當此於是命弼弼再拜而祝曰若赤誠奉國者當一發破的如其不然發不中也既射一發而中帝大悅顧謂突厥曰此人天賜我也

蘇夔少聰敏解騎射年十三從父至尚書省與安德王
雄馳射賭得雄駿馬而歸位至通議大夫

崔彭為備身將軍高祖嘗宴達頭可汗使者於武德殿
有鴻鳴於梁上帝命彭射之既發而中帝大悅賜錢壹
萬貫及使者反可汗復遣使於帝曰請得崔將軍一與
相見帝曰此必善射聞於虜庭所以來請耳遂遣之及
至匈奴中可汗召善射者數十人因擲肉於野以集飛
鶩遣其善射者射之多不中復請彭射之彭連發數矢

皆應弦而落突厥相顧莫不歎服可汗留彭不遣百餘日帝賂以綵繒然後得歸

宇文忻年十二能左右馳射驍捷若飛位至右領軍大將軍

虞慶則幼而雄毅身被鎧帶兩鞬左右馳射本州豪俠皆敬憚之位至右武衛大將軍

韓洪字叔明擒虎季弟平陳之役授行軍總管及陳平晉王大獵於蔣山有猛虎在圍中衆皆懼洪馳馬射之

應弦而倒陳氏諸將觀於側莫不歎伏焉王大喜賜練
百足

唐張士貴本名忽肆臂力絕人彎弓一百五十斤左右
馳射矢不虛發

屈突通雍州長安人為工部尚書檢身清正好武略善
馳射平王世充功為第一

馮盎討諸叛獠有賊數萬屯據險要不可攻逼盎持弓
語左右曰盡吾此前可知勝負連發七矢而中七人盎

位至上柱國高羅總管

薛仁貴領兵擊九姓突厥於天山將行高宗出甲令仁貴試之上曰古之善射有穿七札者卿且射五重仁貴射而洞之高宗大驚更取堅甲以賜之時九姓有衆十餘萬令驍捷數十人逆來挑戰仁貴發三矢射殺三人其餘一齊下馬請降仁貴恐為後患並坑殺之更就磧北討其餘衆擒其偽葉護兄弟三人而還軍中歌曰將軍三箭定天山戰士長歌入漢關位至右領軍衛將軍

李巨為夷陵太守安祿山反玄宗方擇將帥張垍言巨善騎射

李晟少從軍於河西節度使王忠嗣擊吐蕃有驍將乘城拒鬪頗多殺士卒忠嗣募軍中能射者射之晟乃引弓一發而斃三軍大呼忠嗣厚賞之因撫其背曰此萬人之敵也位至太尉中書令

王栖曜貞元初為浙西都知兵馬使從節度使韓滉入觀授左龍武將軍知軍事歲餘為鄜坊節度觀察使久

之檢校禮部尚書栖曜性謹厚善騎射始起兵涉寇境
太深遇遊騎四合百步內立表俾之環視發必破的虜
相顧恐懼徐而解去嘗獵會稽山有白額獸卒起草中
應弦而斃在蘇州嘗與諸文士遊虎丘寺平野霽日先
一箭射空再發貫之江東文士自梁肅以下歌詠焉
伊慎少以善騎射為果毅

李光顏與兄光進以葛旃善騎射弟兄自幼皆師之葛
旃獨許光顏之勇健已不能及位至河東節度使

梁霍存從太祖圍濮州有賊外眺樓大詣太祖怒甚召
存射之矢一發而屍墮其下賞賚甚厚

胡貞江陵人也為寧遠軍節度使容州刺史貞體貌洪
壯長七尺善騎射少為縣吏及在巢寇中推為名將隨
巢涉淮浙陷許雒入長安及太祖以衆歸唐貞時為元
從都將從至梁苑表授檢校刑部尚書

後唐李嗣恩字武人騎射推於軍中嘗有時輩臂饑鷹
矜其搏擊武人持鳴鏑一隻睹其狩獲暮乃多之位至

諸軍都指揮使

索自通少能騎射嘗於山墅射獵莊宗鎮太原時遇之於野詳其姓名即補右番廳直軍使後因從獵射中走鹿轉指揮使

張敬達小字生鐵少以騎射著名位至晉州節度使

安元信少有勇力自後唐太祖領太原隸於麾下天祐三年梁人圍李嗣昭於上黨與上將周德威救之一日德威為敵所困梁之驍將有奉武者屢犯我軍元信飛

一矢隨而斃之德威軍遂振太祖聞之以所乘馬并器
仗賜之奏加檢校司空明年莊宗解圍上黨承制授元
信遼州刺史加檢校司徒

米漢賓少時善射嘗因與同輩出獵指一飛鴈隨矢而
落其鏃正中其臆臆上貫一金錢字有篆文示其郡之
碩學皆無識者人甚異之繇是人皆號曰米落鴈一云
嘗為

落鴈
軍校

位至太子少保致仕

晉陸思鐸初仕梁以善射日預其戰嘗於箭筈上而自

鏤其姓名一日射中莊宗之馬鞍莊宗拔箭視之覩思鐸姓名因而記之及莊宗平梁思鐸以例來降莊宗出其箭以示之思鐸伏地待罪莊宗慰而釋之後為梁州刺史尤以挽強見稱明宗舉兵討荆南思鐸與其行時高季興以舟兵拒我思鐸每發矢中敵人則洞胸達腋繇是前鋒稍挫不敢輕進諸軍咸壯之

景延廣陝州人也為侍衛親軍都指揮使延廣少習射以挽彊見稱

安重榮朔州人為成德軍節度使嘗與北來蕃使並轡而行指飛鳥射之應弦而落觀者萬衆無不快抃蕃使因輶所乘馬以慶之繇是名振北狄自謂天下可以一箭而定

漢郭謹字守節太原晉陽人乾祐初為彰德軍節度使謹少從軍能騎射

周李從敏唐明宗之諸子也沉厚寡言善騎射多計數初莊宗召見試弓馬用為衛內馬軍指揮使

高行周初仕後唐遷潁州團練使郡境北多鷺獸一日
牧豎言有伏虎即跨馬彎弧視之虎見騎集厲吻而起
行周矢一發洞胸而斃

李建崇潞州人為左監門衛上將軍少從軍騎射事太
祖為鐵林都將轉突騎飛騎二軍使從莊宗平定魏博
諸州

安叔干晉高祖朝為振武節度使習騎射嘗備邊於塞
上亦事太祖莊宗嘗率騎騎為前鋒

慕容彥超為節度使起家事唐明宗為小豎明宗即位
補供奉官幼習騎射既居近職監臨奉使熟於軍旅稍
遷軍職漸至列校

和凝十九仕梁登進士第滑師賀瓌知其名辟寘幕下
凝尤善射時瓌與莊宗相拒於河上戰於胡柳陂瓌軍
敗而北唯凝隨之瓌顧曰無相隨當自努力凝對曰大
丈夫受主知有難不報非素志也但恨未有死所耳旋
有一裨將來逐瓌凝叱之不止遂引弓以射應弦而死

瓊獲免既而謂諸子曰昨非和公無以至此和公文武全才而有志氣後必享重位爾宜謹事之遂以女妻之繇此聲望益隆

冊府元龜卷八百四十六